

四庫全書

集部

欽定四庫全書

集部

弇州四部稿卷一百六十五

詳校官侍讀學士_臣沈咸熙

中書_臣劉源溥覆勘

總校官原任中允_臣王燕緒

校對官庶吉士_臣陳墉

謄錄監生_臣江軾

欽定四庫全書

弇州四部稿卷一百六十五

明 王世貞 撰

說部

宛委餘編十

三皇本紀天皇氏兄弟十二頭也各一萬八千歲地皇

十一頭各一萬八千歲人皇九頭分長九州合一百五

十世為四萬五千六百年項峻始學篇云天皇十三頭

號曰天靈治一萬八千歲徐整三五歷記云一人十三頭也又地皇興於熊耳龍門山人皇九頭兄弟各三百歲分居九州此以為荒唐未敢信然至晉宋紀各稱毗騫王從古以來不死則至於今當尚在也

人壽至百歲而極彭祖七百餘歲自服僊丹後入流沙亦不言死帝王世紀神農在位百二十年黃帝少昊俱在位百年帝嚳年百五歲堯年百一十八舜年百有十禹湯年俱滿百六韜云文王祖古公壽百二十王李百

歲文王九十七武王九十三周穆王五十即位在世五
十五年蓋世壽也太公年百三十六召公百八十畢公
年亦百餘漢文帝時有樂人竇公者亦年百八十漢張
蒼拜相封侯年百餘歲魏范明友奴二百四十歲晉范
長生兩仕蜀前後百年魏羅結百七歲為外都大官百
二十乃卒梁穰城人年百四十歲唯飲乳鍾離人顧思
遠年一百十二歲凡九娶有子十二人死亡略盡名為
散騎侍郎亦至百二十而卒上津人張元始年一百十

六歲膂力過人進食不異九十七始生子遂無影唐有
李元爽者百三十六歲開元東封太原于伯龍一百二
十八歲宋党翁百七十餘歲譙定百三十歲瓊州楊叔
連百二十二父宋卿百九十五九世祖不語不食不知
其年

竹書紀年所載諸公之壽有可攷者顓頊三十一年產
伯鯨又四十八年而陟為高辛氏六十三年又至堯六
十一年而鯨治河年百七十二歲矣堯六十九年而黜

蓋百八十歲也桀十七年商使伊尹來朝三十一年桀
亡又十二年湯崩湯與尹年相等外丙元年小庚五年
小甲十七年雍已十二年仲壬四年太甲元年而伊尹
放太甲桐宮七年而伊尹亡距湯亡三十餘年計尹之
壽亦可百三十矣紂三十一年西伯得呂尚以為師年
八十又二十一年而紂亡又五年而武王陟又三十七
年而成王陟康王六年而太公薨壽一百五十二也吳
地記諸樊在位十四年餘濟十七年餘昧二十一年僚

十三年閏閏在位二十年夫差二十三年夫差將敗之
數年延州來季札救陳去讓國之歲不下百年則三代
人臣之壽未有如四公者也然攷左傳壽夢卒襄三十
一年去哀七年實七十七年耳其三公紀年攷之正史
亦未盡合然要之在百歲外也

鄭滿長狄僞如之弟焚如簡如以宣二年攻齊衛被殺
計其時僞如當四十餘矣又一百二年而僞如死於魯
東門壽亦將百五十矣魏拓拔主稱神元帝者百四歲

高麗王康年百餘吐谷渾王夸呂即位後自稱可汗者
百年皆外國主也宋史日本國有大臣名紀武內者年
三百七歲尤為異聞

文武以後人主眉壽之高者周穆王百五歲梁武八十
六宋高宗八十一元世祖八十唐玄宗七十八唐高祖
漢武帝及我太祖俱七十一

人主享國之久者周赧王五十九年周穆王漢武帝俱
五十五年周平王五十一年梁武帝四十九年周顯王

四十八年周宣王唐玄宗及我世宗俱四十六年秦莊

襄王齊景公五十九年

宋高宗在位三十一年為太上皇二十五年

即帝王位之晚者武王八十七宋高祖六十四唐明宗
六十一混一之晚者元世祖六十三

大臣老居位者伊尹太公畢召外若張蒼范長生夾谷
吾里補俱近百歲為丞相國公百餘歲卒羅結百十二
歲始以外都大官致仕衛武公九十五而為周卿士鬻

熊九十而為文王師高允九十為中書令九十八以左
光祿大夫來敏九十七以執慎將軍呂岱九十六以大
司馬李先九十五以內都大官司馬孚九十三以太宰
都督中外諸軍士燮九十三以交州牧王盤九十二以
翰林學士劉寔九十一以太尉張儉以太師夏侯勝九
十以太子太傅楊統九十以光祿大夫卒張萬福八十
餘以工部尚書致仕九十卒食祿七十年未嘗一日病
王裕之八十八以左光祿大夫開府儀同三司王起八

十八以左僕射同平章事山南西道節度使卒郭丹八十五以司徒罷郭伋八十五為華州牧明年以太中大夫卒王祥八十四以太保睢陵公致仕明年卒郭子儀八十五以尚父太尉中書令汾陽王趙熹八十四以太保張儉八十四以衛尉卒史浩八十四以太保魏國公致仕八十九以太師卒喬行簡八十五以少傅平章軍國重事乞祠八十六卒趙充國八十餘以後將軍營平侯罷就第八十六卒張皓八十三以廷尉罷貢禹八十

二以御史大夫胡廣八十二以太傅錄尚書事卒蔡義
拜丞相已八十餘董昭八十一為司徒張昭八十一為
輔吳將軍公孫弘韋賢俱八十以丞相陶侃長孫嵩俱
八十以太尉卒韋安石八十以左僕射始為亂兵所害
太傅鄭袤食祿六十餘年其他未可悉紀

宰相秉政之久者漢蕭鄼侯何漢元年為丞相進相國
至惠二年卒凡十四年張北平蒼文帝前四年為丞相
至後四年免凡十四年霍博陸光以後元二年為大司

馬大將軍秉政至地節二年卒凡二十年王陽平鳳以
竟寧元年如光官秉政至陽朔三年卒凡十一年吳廣
平漢以建武元年為大司馬豫政至二十年卒凡二十
年曹太祖操以建安三年為司空擅政至進丞相魏王
卒凡二十五年諸葛武鄉亮以章武元年為丞相秉政
至建興十一年卒凡十四年晉王始興導以建武元年
為驃騎將軍錄尚書事進司空司徒太保丞相以咸康
五年卒凡二十二年謝廬陵安以寧康元年為僕射秉

政進衛將軍太保以太元十二年卒凡十二年劉高祖
裕以義熙四年為開府儀同三司錄尚書事擅政進太
尉太傅相國宋王至永初元凡十三年宋劉彭城義康
以元嘉六年為司徒秉政十七年以大將軍出督凡十
二年魏長孫北平嵩以天興元年為司徒輔政進太尉
柱國大將軍以太延元年卒凡四十年高神武歡以中
興元年為太師大丞相擅政天平十二年卒凡十六年
宇文太祖泰以太昌三年為丞相擅政齊王廓三年以

太師大冢宰卒凡二十三年隋高齊公頴以開皇元年
為左僕射輔政至罷凡十九年唐房梁公玄齡以貞觀
元年為右僕射輔政進司空至卒凡二十一年李晉公
林甫以開元二十三年同中書門下三品擅政天寶十
載以左僕射右相文部尚書死凡十九年元進賢載以
寶應元年同中書門下平章事秉政大厯十二年誅凡
十六年宋秦申王檜以紹興八年右僕射同平章事再
擅政進少保太師以二十四年死凡十七年史衛王彌

遠以嘉定元年為右丞相樞密使擅政進少師太傅太師以寶慶六年卒凡二十七年賈魏公似道以開慶元年為少師右丞相樞密使擅政進太師平章軍國重事德祐元年竄凡十七年此皆首尾在政府者也

若霸國之相無過於管仲魏冉者管仲以桓公元年執齊政至卒凡四十一年魏冉以昭襄元年為將軍執秦政封侯至十二年為相至罷凡三十六年

白起以昭襄十三年為大將至五十年而罷凡三十七

年廉頗以趙孝成王十六年為大將四十年悼襄王元年奔魏

凡出入將相最久者絳侯周勃從入漢為威武侯相國太尉再為丞相就國凡三十四年潁陰侯灌嬰為昌文侯御史大夫車騎將軍太尉丞相凡三十年酈疥數將兵有功不當侯十二年用父食其故封高梁侯凡六十年張北平蒼以代相封侯為計相四歲淮南相十四歲御史大夫六歲丞相十四歲比卒凡五十五年司馬宣

王自撫軍大將軍受遺輔政進太尉太傅大都督凡二十三年司馬孚自司空至太宰三十年桓南郡溫自都督荊州平蜀進開府太尉大司馬都督中外諸軍錄尚書事楊越公素以御史大夫為行軍元帥僕射尚書令司空司徒太子太師出入將相俱二十七年劉江夏義恭自都督荊州進司空司徒錄尚書太尉太保太傅領大司馬太宰三十四年長孫趙公無忌以尚書左僕射罷政為開府司空後去尚書門下省加司徒太子太師

後同三品加太尉檢校中書令知門下省加太尉任公
輔者三十六年李英公勣初授大將軍至左僕射司空
太子太師出入將相垂五十年郭汾陽子儀以使相進
司空司徒副元帥尚父太尉二十六年滿中書令二十
四考裴晉公度四為同平章事三建節一留守官司空
司徒侍中中書令凡二十五年錢吳越王鏐建鎮海鎮
東節加太尉太師中書令尚父天下兵馬大元帥凡四
十年張齊王全義自河南尹建節加太師尚書令天下

兵馬副元帥凡四十年馬楚王殷建武安四鎮節加太
師天策上將凡三十八年趙韓王普三為首相三建節
一為西京留守左僕射太子太保少保司空司徒侍中
太保中書令凡二十九年文潞公彥博再為首相一平
章軍國一首元樞五換節領兩鎮加侍中司空司徒太
尉太師垂五十年蔡魯公京自左僕射入凡五拜相一
為司空太尉太子少師太子太師再授太師領三省事
凡二十三年史魏王浩一為右僕射右丞相樞密使三

領祠加少保少傅太保太師凡三十二年安圖三為中書右丞相一鎮北邊垂四十年

夏侯嬰為太僕事四主二十九年于定國為廷尉十八年

宋閩人蔡伯佈三歲應薦真宗授秘書正字歷州郡至八十以列卿致仕食祿七十七年而無可紀孝宗朝呂嗣興四歲授右從政郎皇孫榮國公伴讀後亦無聞

佩六國相印者蘇秦五國相印者犀首六國上將者公

子無忌五國上將者項籍

漢世五為三公者胡廣四為三公者楊賜三為三公者
黃瓊楊彪唐五入相者蕭瑀裴度崔胤四入相者韋巨
源姚崇韋安石三入相者武承嗣武攸寧豆盧欽望武
三思李嶠李懷遠崔湜劉幽求張說張延賞王鐸鄭畋
五季三入相者馮道

宋五入相者蔡京三入相者趙普呂蒙正呂夷簡張士
遜文彥博

昔人以馮道比胡廣蓋言其遭際行履之同也漢順帝五年胡廣已為尚書僕射又十年而以大司農為司徒質帝元年梁冀弑帝為太尉桓帝元年罷十月為司空五年致仕又四年以太常為太尉又二年梁冀誅為庶人又八年以太常為司徒又二年為孝靈元年叅錄尚書事其年宦官殺陳蕃等進太傅錄尚書事封又四年卒凡事和順質冲桓靈六帝周流四公三十餘年馮道始事唐莊宗莊宗為明宗所篡事明宗三年由端明殿

學士為中書侍郎同平章事廢帝為潞王所弑事潞王以司空平章出鎮義成石晉滅潞王四年入為司徒侍中出帝初以太尉侍中鎮匡國契丹滅晉為太傅漢入洛為太師周篡漢以太師為中書令瀛王凡五國十一主出入將相三公者二十四年

馮道作長樂老叙為千古譏笑之端固也其時有竇貞固顯唐莊宗朝為石晉學士漢司空首揆周加司徒侍中以迄罷相至宋用前三公赴闕陪位乞以東宮三少

奉朝請不得歸洛卒年七十八自為墓志張昭事王師
範義不臣梁事唐莊宗勸張憲以死節而身後倍之歷
後唐晉漢周皆顯官以至宋祖至吏部尚書封陳國公
宋琪為契丹進士事漢周及宋拜相兩朝王易簡舉梁
進士至周顯德位太子少保宋初加少傅三公壽俱七
十九琪又作多幸老民叙易簡構一鳴堂二品樓蓋不
為長樂之見者少矣

顓頊十歲而為少昊相帝嚳十五而為顓頊相唐堯十

五而為帝摯相甘羅十二而為秦上卿介子推十五而為楚相韋康成十五而為郡主簿司馬元顯高澄俱十六開府輔政崔英十七而為苻秦諫議大夫子奇十八而為齊東阿守張緬十八為漢淮南守賈誼十八為博士終軍二十為謁者俱有聲

安圖二十一為丞相董賢二十二大司馬劉義康二十三為司徒錄尚書事劉休仁為司徒尚書令霍去病二十四為大司馬鄧禹為大司徒蕭子良元勰二十六為

司徒錄尚書事安圖子阿都岱亦以二十六為大司徒
宇文泰二十七為丞相高岳為太尉高淑太師錄尚書
事托克托為中書右丞相王儉二十九為僕射秉政又六
年拜開府巴延三十為中書左丞相廉希憲三十為中
書平章政事王溥三十二為平章事范宗尹三十二為
右僕射張俊三十一為元樞若衛青之拜大將軍長孫
無忌之拜僕射當亦僅三十餘也中有宗室諸王然實
秉政著聲稱者始記之

荀羨以二十九為北府中郎將監青徐諸軍事稱中興
諸將未有如其少者謝晦三十五都督荊州而有矜色
其兄瞻以荀中郎譏之晦大慙然荊州重鎮而晦以執
政出督官為衛軍三司之亞非羨比也若其至少者齊
王憲十六為益州總管霍去病十八為嫖姚校尉出塞
有功封侯塔斯為行省國王破金鄧禹二十三拜前將
軍定關中大都督賀拔岳被禍僅二十六而宇文泰代
之為二十五唐洛州總管淮陽王李道玄行軍總管鄭

國公羅士信各死事道玄僅十九士信二十而盧祖尚
拜光州總管杜伏威拜東南道大行臺吳王俱二十三
李世勣以黎陽來歸拜大將軍封英公亦僅二十六然
則荀羨之二十九固不足道也

後漢以三公為真相唐以平章事為真相四代至三公
者漢楊震子秉秉子賜賜子彪俱拜太尉為上公賜雖
以司空終獨封侯三代三公者太尉安國亭侯袁賜子
司空逢逢子太傅隗三代拜相者唐中書令河東侯張

嘉貞左僕射同平章事魏郡公延賞中書侍郎同平章事高平侯弘靖此外雖蕭氏之八葉亦未有的傳至三世者若司馬太傅懿相國昭相國炎錢太師鏐元瓘俶皆可以稱三世三公然權政強藩非繇勲德

父子配享廟庭者唐太師西平王李晟太尉涼國公李愬宋中書令濟陽王曹彬侍中瑋尚書令魏郡王韓琦太師儀國公忠彥若父子俱為宰相或大將位望俱極隆重者商宰相衡伊尹左相陟漢丞相絳侯周勃丞相條

侯亞夫吳丞相荊州牧婁侯陸遜大司馬荊州牧婁侯
抗北齊左丞相咸陽王斛律金左丞相咸陽王光唐太
尉中書令西平王李晟左僕射涼國公愬其次則韋賢
玄成李邵李固袁安袁敞王龔王暢蘇瓌蘇頲韓休韓
滉李吉甫德裕韓琦忠彥呂夷簡公著之類差亦可紀
宋石守信以檢校太師使相領陳州節年五十七卒於
鎮子保吉歷中外亦以檢校太師使相領陳州節年五
十七卒於鎮守信贈尚書令保吉贈中書令可稱奇事

父子同時在大位若為三公者漢右將軍上官桀驃騎

將軍安

從公

大司馬大將軍霍光右將軍禹大將軍耿況

大將軍弇相國司馬昭開府儀同三司炎

從公

晉太宰司

馬孚大司馬望太傅司馬導子開府儀同三司元顯宋

太傅蕭道成開府儀同三司蹟魏太師馮熙司徒誕太

師元繼開府儀同三司義太師大丞相高歡大將軍澄

北齊左丞相斛律金太保光後唐中書令趙德鈞侍中

延壽

同公

吳太尉徐知誥司徒景通宋太師尚書令錢俶

檢校太師侍中惟濬太師蔡京太保攸太師秦檜少師
燾元太師伊徹察喇太保塔喇海少子太師和托與父
同太保滿濟勒台右丞相托克托

父子對秉機政者晉王渾為尚書左僕射濟為侍中治
門下省吳紀亮為尚書令子鵬為中書令導子元顯俱
為錄尚書事時稱東錄西錄蔡京領三省事秦檜為尚
書左僕射滿濟勒台為中書右丞相攸燾托克托俱知樞
密院事

父居大藩而子秉政者高歡以大丞相行臺晉陽澄以
中書監京畿大都督秉政徐溫鎮金陵知訓知誥先後
秉政趙德鈞鎮盧龍延壽以樞密使秉政伊徹察喇為
行省右丞相鎮和林而塔喇海和托相繼以中書右丞
相秉政

父子同建節者郭汾陽朔方子晞邠寧行營節宣武韓
弘河陽公度魏博田弘正河陽布盧龍趙德鈞忠武延
壽延壽為隨駕行營都部署而德鈞為東北面行營都

統淮南錢俶山南東道惟濬其他若錢鏐之於傳瓘馬殷之於希聲建節於父國者不論也

父子同時封王公侯者自宗室外昌黎王馮熙南平王誕魯國公蔡京燕國公攸益國公秦檜嘉國公熺各自以恩澤封義陽王陸侯東平王麗舒國公李蓋英國公世勣東光侯耿況好時候弇婁侯張昭都鄉侯承宣城侯諸葛瑾都鄉侯恪各自以功猷封

父子丞相周勃子亞夫韋賢子玄成曹操子丕斛律金

子光史浩子彌遠

父子太師王舜子匡史浩子彌遠伊徹察喇子和托滿
濟勒台子托克托明則張輔張懋

父子天策上將軍楚王馬殷子希範

父子狀元者獨宋梁顥及固耳本傳止言甲科考登科
錄記之按遜齋閒覽梁顥八十二歲雍熙二年狀元及
第其謝啓曰皓首窮經少伏生之八歲青雲得路多太
公之二年容齋四筆云以國史攷之梁公雍熙二年廷

試甲科景德元年以翰林學士知開封府暴卒年四十
二朝野雜記謂顥登第年才二十二胡鴻臚真珠船謂
宋史顥卒九十二溯其登第時乃七十三非八十二又
謂雜記乃固登第之年此大可笑非宋史九字為四字
之誤則狃於遜齋間覽之說也按雍熙二年乃太宗太
平興國八年以後改號也據本傳父文度早世顥養於
叔父時王禹偁舉鄉貢顥依以為學嘗以疑義質於禹
偁禹偁拒之不答顥發憤讀書不期月復有所質禹偁

大稱賞之禹偁以太平八年舉進士於顥差為前輩今據間覽真珠船所云則顥之少孤當在沙陀石晉之際而長於禹偁且四十餘年矣其不相應一也顥若果九十有二豈使之為翰林學士又使之權知開封而暴卒耶其不相應二也子固以大中祥符元年甲第僅二十三顥卒時十八耳而又有弟述及適俱相仁宗朝至熙寧三年卒年七十去景德元年顥卒時僅三歲耳顥七十五而得固九十而始得適其不相應三也顥以四十

二歲卒固以三十三歲卒於事理甚明中間顯所歷官
皆繁劇其上封事無老人意史又稱其美風姿強力少
疾於遜齋之說有毫髮類耶洪文敏在內制久其見國
史甚真與朝野雜記之言同真珠船又似夢中說夢矣
宋諫議大夫贈太子少師陳去非長子右僕射前同書
門下平章事樞密使贈侍中謚文忠堯叟次太子太師
前同中書門下平章事贈司空侍中謚文惠堯佐天雄
節度使贈太尉謚康肅堯咨一相中書一長樞密一為

侍從俱登甲第而堯叟堯咨復第一俱建節徽猷閣學士謚忠宣洪皓長子尚書右僕射同中書門下平章事謚文惠适知樞密院謚文安遵端明殿學士謚文敏邁父子兄弟俱登制科知制誥而皓以徽猷适以觀文遵以資政邁以端明俱學士終二家極為相類

參知政事太子少師謚忠獻韓億子尚書左僕射同中書門下平章事司空贈太傅謚獻肅絳門下侍郎太子少師維尚書右僕射中書侍郎太子太保贈司空縝兩

為宰相兩為執政樞密使侍中贈中書令謚武惠曹彬
子河陽節度使同平章事贈中書令謚武懿璨彰武節
度使贈侍中瑋定國軍節度使贈侍中謚忠恪琮兩登
樞宥兩列環衛分贈兩省之長億八子彬七子餘各有
顯宦可為文武之極致而亦相類

郭尚父子儀以司徒中書令關內河東副元帥河中尹
靈州大都督單于鎮北大都護朔方節度關內度支鹽
池六城水運大使押蕃部并營田及河陽道觀察等使

汾陽王冊拜太尉贈太師謚忠武八子顯者四太子少
保代國公曜太子賓客趙國公晞太常卿代國公暖金
吾大將軍祁國公曙李西平晟亦以司徒中書令鳳翔
隴右涇原節度使營田觀察處置等使兼行營副元帥
西平王冊拜太尉贈太師謚忠武十三子而顯者亦四
河中節度使愿嶺南節度使憲魏博節度使平章事涼
國公愬河中節度使太子太保聽西平功名壽考差亞
於汾陽而四子則小勝與汾陽埒者太尉侍中臨淮李

武穆王光弼功名雖盛而晚誠有差與西平將者司徒
侍中北平馬莊武王燧功烈忠猷皆不及也武穆一子
彙至涇原節莊武二子一亦曰彙蚤卒一曰暢至少府
監而其後俱不振

唐右拾遺竇叔向有五子祭酒常司業牟中丞羣刺史
庠中丞鞏五季諫議大夫竇禹鈞有五子尚書儀侍郎
儼補闕侃叅知政事偁起居郎僖二家名位才望俱相
等今人但知有燕山而不知有補闕也

兄弟狀元自陳堯叟堯咨外有孫何孫僅制科蘇軾轍軾入三等轍四等宋祁廷試第一兄郊第三而唱名太
后改郊第一亦可稱兄弟狀元矣

魏太尉穆崇子太尉觀尚宜陽公主觀子征東大將軍
中書監壽尚樂陵公主壽子中書監平國尚城陽公主
平國子中書監羆尚新平公主羆子尚書令司空亮尚
中山公主亮子開府中書監紹尚瑯琊公主凡六世尚
主諸昆李尚主者又十餘人七世掌機密四為三公二

代封王古所未有

三尚公主者宋彭城王劉昶仕魏至大將軍前後尚武
邑建興平陽凡三公主主三嫁駙馬者唐定安公主初
嫁殿中監王同皎次嫁衛尉少卿韋濯三嫁太府卿崔
銑齊國公主始嫁太常卿張洎次嫁裴潁三嫁楊敷寧
國公主初嫁鄭興次嫁薛康衡三嫁迴紇英武威遠可
汗

武相元衡與李相吉甫同年生以同日拜相武以御史

中丞遷門下侍郎李以中書舍人遷中書侍郎俱同中書門下平章事武出鎮西川明年李出鎮淮南久之李復入為中書相武以次年十月復入門下相李以又次年十月卒卒之日為武生日武以又次年十月殞盜其日亦李生日

秦國錢忠懿王俶生一甲子以八月二十四日生亦以八月二十四日卒又與父元瓘同日卒

宋曾丞相布以卯年卯月卯日卯時卒韓丞相絳以辰

年辰月辰日辰時生韓發解南省殿試皆第三以熙寧
三月三日卒人尤異之金有田轉運時秀者所居里名
半十行第五以五月五日生小名五兒年二十五應鄉
府省殿四試俱第五名年五十五以八月十五日卒造
物之巧如此

官名有極貴而極繁者聊志其一二唐有回天再造竭
忠守正功臣太尉檢校太師中書令諸道兵馬元帥判
左右神策六軍十二衛事護國宣武宣義忠武四鎮節

度管内觀察處置營田等使鹽鐵度支戶部三司都制
置等使解池榷鹽使梁王朱全忠宋有開吳鎮越崇文
耀武宣德守道功臣太師尚書令兼中書令天下兵馬
大元帥鎮海鎮東軍節度管内觀察處置等使上柱國
吳越國王食邑九萬七千戶實封一萬六千九百戶入
朝不趨劔履上殿錢俶元有元德上輔廣忠宣義正節
振武佐運功臣太師開府儀同三司秦王達爾罕中書
大丞相上柱國錄軍國重事監脩國史兼徽政院侍正

昭功萬戶府都總使虎符威武阿蘇衛親軍都指揮使
司達嚕嚕齊忠翊侍衛親軍都指揮使奎章閣大學士
領學士院知經筵事太史院宣政院事伊克肯哈爾布沁
十戶達嚕嚕齊宣忠烏魯斯扈衛親軍都指揮使司達
嚕嚕齊提調回回漢人司天監群牧監廣惠司內史府
左都威衛使司事欽察親軍都指揮使司使宮相都總
管府領大禧宗禋院兼都典制神御殿事中政院事宣
鎮侍衛親軍都指揮使司達嚕嚕齊提調宗人蒙古侍

衛親軍都指揮使司提調哈喇齊伊克肯徹爾領隆祥使司事倣藩臣也全忠巴延權臣也

秦班列侯在丞相上漢丞相必封侯以故無列丞相上者後御史大夫亦在列侯上若唐開元以前加三公者雖不與政事係正拜官尚在宰臣之上代宗以後稍不然矣而僕射為故相其體尚尊司空不由宰相加自王思禮始宋時班次東宰執次使相西為親王趙普罷相後始加晉王光義侍中班宰相上至太平興國七年趙

普復為司徒兼侍中秦王廷美舊以太師中書令班宰相上至是復居普下仁宗初曹利用以樞密使加司空侍中欲班宰相王曾上不可神宗初陳升之初拜平章事時文彥博以舊元相為司空侍中兼樞密使特詔居升之上固辭而止然則親王使相雖至三師三公不敢班宰相上其三師三公僕射不帶平章事不敢班宰相上也又唐書成用官高者一人書名歐陽脩以宋祁先達乃分注紀志表屬脩而列傳屬祁至於進書次序俱

在祁前然考其官則祁以殿學兼侍讀龍圖二學士吏部侍郎河內郡開國公脩以翰林龍圖二學士給事中安樂郡開國侯官序脩本在下也蓋祁出知鄭州而脩實為學士故耳此亦足以見宋官秩之次

弇州四部稿卷一百六十五

欽定四庫全書

弇州四部稿卷一百六十六

明 王世貞 撰

說部

宛委餘編十一

秦始皇滅六國寫其宮室作之咸陽北坂上自雍門以東至涇渭交處殿屋複道周閣相屬然各自為區雖一瓦一甃之造亦如其式各書國號不相雷同皆布其所

得諸侯美人居之如在其國鐘鼓帷帳不移而具至於
出狩豐貂東至獬豸南來又有玄旗皁旒之制罕車之
飾寫九王之廷於咸陽北坂車輿之綵各樹其文所謂
秦人大備而陳戰國之後車者也見秦史晉志為詳

按三輔舊事西京雜記諸書阿房宮前殿東西三里南
北五里前庭中可受十萬人車行酒騎行炙千人唱萬
人和一云上可以坐萬人下可以建五丈旗闕內離宮
三百闕外四百餘漢未央宮周回二十八里前殿東西

五十丈深十五丈高二十五丈有殿閣三十二至孝武以木蘭為樊橑文杏為梁柱金鋪玉戶華棖壁璫雕楹玉碣重軒鏤檻青瑣丹墀左城右平黃金為壁帶間以和氏珍玉風至其聲玲瓏然也未央在城西偏而長樂在東太后多居之周回十九里又有桂宮北宮明光宮在北周回各十餘里孝武又建建章宮於未央宮西長安城外跨城池作飛閣通之構輦道以上下周回三十里宮正門曰閭闔高二十五丈左鳳闕高二十五丈右

神明臺門內北起別風闕高五十丈對峙井幹樓高五十丈輦道相屬馬連閣皆有罽毼前殿下視未央其西則廣中殿受萬人廟記云北闕門高二十五丈又有鳳皇闕高七十丈五尺又畿內千里京兆治之前乘秦嶺後越九峻東薄河華西涉岐雍內外宮一百四十五所隋文帝遷都其正宮正殿皆名大興隋煬帝因之致美人於西苑後多幸東京江都以及唐改名太極宮然俱無所增飾高宗於宮東北取苑地建大明宮其廣袤亦及

五里尚未能建章之半也宋東京宮殿初因朱梁之舊
建隆三年倣洛陽宮殿脩之始為壯麗然周迴不過五
里至晉南渡都建康朝宴所臨止東西二堂宮門之外
編竹以為儲胥而已宋南渡都臨安以州治為行宮制
度簡省垂拱大慶文德紫宸祥曦集英六殿隨事易名
實一殿重華慈福壽慈壽康二宮重壽寧福一殿隨時
異額實一宮延和崇政等四殿本一射殿天章龍圖等
九閣實天章一閣大內尤庠階墀僅三級比於江南

大家而已秦漢大駕屬車八十一乘法駕屬車三十六乘晉過江後但六乘而已天子無復六馬三乘五路皆駕四而已無復五時車有事則權以馬車代之建旗其上其後但以五色木牛象五時車豎旗於牛背行則使人輿之一何凌替也

梁孝王廣睢陽城七十里西苑方二百里作曜華宮築兔園園中有百靈山膚寸石落猿巖栖龍岫又有鴈池池間有鶴洲鳧渚其諸宮觀相連延亘數十里奇果異

樹珍禽怪獸畢備王日與宮人賓客弋釣其中是漢之
諸王踰於後世人主也梁冀廣開園囿採土築山十里
九坂以象二嶠深林絕澗有若自然奇禽馴獸異方珍
怪畢有是漢之貴戚踰於後世人主也袁廣漢於北山
下築園東西四里南北五里激流水注其中橫石為山
高十餘丈連延數里養白鸚鵡紫鴛鴦犂牛青兕奇獸
珍禽委積其間積沙為洲嶼激水為波濤致江鷗海鶴
孕雛產鰒延漫林池奇樹異草靡不植培屋皆徘徊連

屬重閣脩廊行之移晷不能徧是漢之富民踰於後世人主也

中國之人長一丈者人君則黃帝堯與文王人臣則吳伍員漢巨毋霸俱十尺毋霸腰帶十圍員眉間廣一尺元魏南明太守慕容叱頭長一丈圍九尺禹短一寸春秋演孔圖孔子長十尺一云九尺六寸按莊子所謂自腰以下不及禹三寸則後說似矣宋程史載有唐某者與其妹各長一丈二尺

禹長九尺九寸湯九尺秦始皇八尺七寸漢高祖七尺八寸光武七尺三寸昭烈七尺五寸宋武帝七尺六寸陳武帝七尺五寸宇文周太祖八尺項王八尺二寸韓王信八尺九寸一曰八尺五寸王莽七尺五寸劉淵八尺四寸劉曜九尺四寸慕容皝七尺八寸姚襄八尺五寸冉閔什翼犍宇文泰皆八尺慕容垂七尺四寸慕容德八尺二寸自唐以後人主長者故少韋康成十五長八尺姜宇十五長七尺九寸劉曜子脩十歲長七尺五

寸美姿貌眉鬢如畫人固有少而長若此者脣後止八尺四寸不能如其父也

苻堅時有申香夏默護磨那俱長一丈九尺為拂蓋郎一云一丈六尺一云一丈三尺則長之之極者然是外國人也又大秦人長一丈五尺好騎駱駝

孔子曰人長不過一丈然至於骨節專車又孔子所對防風氏也列子龍伯國人長三十丈洞冥記云支提國人長三丈三尺三臂三指皆以為寓言璵說然防風身

橫九畝自古記之鄆滿國君長狄僑如長三丈一云五丈犯魯為叔孫得臣以戈椿喉而死其父緣斯犯宋為皇父所殺弟焚如先犯齊為王子成父所殺簡如走至衛復為衛所殺長狄之種遂絕然則長者僅其君耳且以人三丈而親戰陣未有不斃於矢石者也南海有毗騫國王長丈二頭頸三尺一名長頭王

佛長一丈六尺以為神然其小弟阿難與從弟調達俱長一丈四尺五寸彼時天竺之長者故不少也

女子長者明德馬皇后和熙鄧皇后俱七尺三寸劉曜
劉皇后七尺八寸俱以美著稱若今則不以為雅矣惟
劉曜長九尺四寸庶幾相稱

中國人短者蔡謨外親王蒙長三尺潁川張仲師長二
尺二寸又按論衡云長一尺二寸

人之肥重者安祿山稱三百五十斤司馬保八百斤至
孟業千斤極矣業嘗為幽州督辭晉武帝帝稱之果得
千斤

記有廣川趙翁伯者夏月裸卧其孫兒戲以李納臍中
數日有殷紅汁液滋流以為臍爛憂而哭目盡腫久之
肉盡核出乃知為李孫所戲納也數之得七枚則其臍
深不下數寸大亦稱之矣又苻秦時大豪王某者錄於
獄其人素雄勇博碩忿而自屠其腹刀入徑寸不能破
乃置刀於壁奮身觸之始透其肥重亦可推矣

漢書稱韓博上言巨毋霸輶車不能載三馬不能勝即
日以大車駟馬載詣闕魏史拓拔猗色魁岸馬不能勝

恒乘安車駕大牛牛角容一石是二人者稱之當在孟業下晉王保上

項王舉鼎拔山喑鳴叱咤千人皆廢百戰無前膽力威勇足冠千古其他若蜀五丁力士能移山舉萬鈞每王薨輒立大石長三丈為墓志曰苐里秦烏獲又夏育俱能舉移千鈞千鈞蓋三萬斤衛石蕃能負沙一千二百斗當為一百二十石可謂神力矣而俱不聞有戰伐之勲泯泯以死何也書所載魏任城王曹彰太廟新成萬

斤鐘負之而趨擗白象鼻頓之於地以臂繞虎尾伏不敢動然是時海內稱闕張為萬人敵不數任城也北魏盧曹長九尺餘勇力與沙門曇讚埒嘗以海神脰骨為馬稍以遺齊神武諸將莫能舉惟彭樂強舉之南梁羊侃伏而作虎狀以指抉壁入三寸弓力至二十石泗州十石人各長八尺許執而對擊之俱碎又於壁直上七步橫蹋得五跡而是時海內以高敖曹配項羽不數羊盧也元鄭澤舞劒能使壯士十馬首俱墮而我明稱勇

將為常開平傳賴公輩陳有張定邊潯無聞也豈有力者不必有膽耶一萬鈞當為三十萬斤此恐記者之過偶閱嚴氏籍沒之數臆記古之富者太史公以貧致宮刑故津津談貨殖也

以貴而富其最著者秦魏冉呂不韋楚黃歇漢霍光張安世張禹王鳳等五侯董賢梁冀董卓曹騰等魏曹洪晉石崇王愷王濟徐湛之阮佃夫梁蕭宏朱异羊侃北魏元禧元雍元琛元融李崇隋楊素唐裴寂李林甫楊

國忠郭子儀韋宙裴冕元載李德裕王涯楊收吳越孫
承佑蜀李昊宋蔡京梁師成韓世忠張俊楊沂中史彌
遠韓侂冑賈似道元雅克特穆爾巴延朱清張瑄其無譏
者僅郭汾陽韓蘄王耳

能自力致富者陶朱公白圭猗頓巴寡婦臨邛卓王孫
程鄭宣曲任氏茂陵袁廣漢平陵士孫億東海糜竺平
邑王氏洛陽劉寶長安王元寶王酒胡鄒鳳熾即鄒駱
駝及勝國倪瓚顧瑛沈萬三皆著在史傳甚詳

王愷作紫絁布障四十里石崇乃作錦步障五十里敵之愷恒不勝武帝助之賜以珊瑚樹高二尺許以示石便以鐵如意擊之應手而碎君夫方惋惜以為疾已之寶石徐曰不足多恨今還卿乃命左右悉取珊瑚樹有高三四尺者六七株條幹絕俗光彩耀目如君夫比者甚衆乃恍然自失外國有進帝火浣布者帝服以幸李倫李倫身敝服候帝左右從奴五十人悉衣火浣衫秦皇為巴寡婦築女懷清臺又令倚頓得朝見比封君

卓王孫有綠熊皮百雙漢武帝令進二十雙至唐明皇
見南山白龍問左右俱不見獨王元寶見之以至富與
至貴敵也元寶又謂明皇請以南山一樹挂臣一縑山
樹有盡臣縑無窮又黃巢亂後脩宮闕有商兒王酒胡
助錢三十萬貫後脩安國寺成上幸之為擊十杵施錢
萬緡羣公有擊至五杵者一日王酒胡乘醉入連撞百
杵徑輦十萬緡寘寺而去一布衣乃敢與人主酬酢遂
爭雄長不減齊奴

梁冀父子擅權垂二十年貪聚無極而斥賣家財三十餘萬萬董賢之幸不過三年耳而斥賣家財至四十三萬萬賢不聞納賄蓋傾府庫以益之也梁武帝幸臨川王宏第錢千萬一庫懸一紫標凡三十間僅三萬萬而梁時錢薄小不能三分之一其他布絹上綿漆密紵蠟朱砂雜貨物積亦梁董之亞矣

梁孝王薨時餘黃金四十萬斤吳王濞金錢布滿天下漢時黃金多而王侯巨富乃爾

卓王孫家僮千餘人程鄭折國石崇俱八百人袁廣漢
九百人王氏五侯刁達楊素各數千人高陽王雍六千
人郭汾陽三千人呂不韋廩竺萬人

達田萬頃
素馬萬匹

史稱窮奢極欲者五侯羣弟爭為奢侈賂遺珍寶四面
而至羅鐘磬舞鄭女作倡優狗馬大治第舍起土山漸
臺洞門高廊閣道連屬相望郭况起高閣以量金玉錯
雜寶以飾臺榭懸明珠四垂晝視之如星夜望之如月
梁冀大起第舍妻孫壽亦對街為宅殫極土木互相誇

競堂寢皆有陰陽奧室連房洞戶柱壁雕鏤加以銅漆
牕牖皆有綺疏青瑣圖以雲氣僊靈臺閣周通更相臨
望飛梁石磴陵跨水道金玉珠璣異方珍怪充積私室
遠致汗血名馬又廣開園囿採土築山十里九坂以象
二嶠深林絕澗有若自然奇禽馴獸飛走其間冀壽共
乘輦車張羽蓋飾以金銀游觀第內多從倡伎鳴鐘吹
管酣謳竟路或連繼日夜以騁娛石崇婢美艷千餘人
常擇其姿容相類者數十人裝飾衣服大小一等調四

方玉付工為倒龍之珮，縈金為鳳冠之釵，結紳繞楹而舞，欲有召者，不呼姓名，悉聽珮聲，視釵色，各含異香，使行而笑語，則口氣從風而颺。又屑沈水香末，布象牀上，使所愛踐之，無跡者，即賜珍珠百琲。初，最幸為翺風，後翺風退，房幸，綠珠、珠弟子、宋、褱、有國、色、善、笛，後入明帝宮中。蕭宏後，庭數百十人，皆極天下之選，所幸江、無、畏、器、服、珍、異，侔於東昏。潘妃寶屨，直千萬羊，侃在衡州，於兩艫符起三間，通梁水，齋飾以珠玉，加之錦繡，盛設帷

屏列女樂乘潮解纜觀者填溢嘗宴北使陽斐賓客三百餘人食器皆金玉雜寶奏三部女樂及夕侍婢百餘人俱執金花燭魚弘侍妾百餘不勝金翠服翫車馬冠絕一時有眠牀一張皆是感栢四面周匝無有一異通用銀縷金花壽福兩重為脚高陽王元雍居第匹於帝宮白壁丹楹窈窕連雲僮奴六十妓女五百隋珠照日羅衣從風時河間王琛欲敵之造文栢堂如徽音殿置玉井金罐以五色絹為繩伎女三百盡皆殊色求西域

千里馬其次七百里者十餘匹皆有名字以銀為槽金為環鎖嘗會諸王陳諸寶器金鉗銀甕百餘口甌擎盤盒稱是餘器有水精鉢瑪瑙琉璃盃赤玉卮數十枚工作奇妙中土所無又陳女樂及諸名馬復引諸王案行府庫錦罽珠璣冰羅霧縠充牣其內謂人曰不恨我不見石崇恨石崇不見我楊素後庭伎妾曳綺羅者以千數第宅奢侈僭擬宮禁有鮑亨者善屬文殷胄者工草隸竝沒為家奴秦王楊俊為妃作七寶羃羅車不可載

以馬負之而行又為水殿香粉塗壁玉砌金階梁柱棖
棟之間周以明鏡間以寶珠極瑩飾之美與賓客伎女
絃歌其上張易之為母阿臧造七寶帳鋪象牙牀織犀
角氍毹襍蟲氍毹汾晉龍犀臨河鳳翽為席宗楚客造
一宅皆是文栢純帖沈香和紅粉泥壁文石為階砌安
樂公主造定昆池四十九里累石為山以象華岳引水
為澗以象天津飛閣步檐斜橋磴道衣以錦繡畫以丹
青飾以金銀瑩以珠寶又為九曲蓮花臺泉於臺湧出

窮天下之壯麗楊國忠諸姨弟五家聯巨治錦繡琢金玉者大抵千人變化若神僊每帝幸華清宮五家隊合炯若萬花川谷成錦繡遺鈿墜舄瑟瑟珠翠狼籍於道香聞數十里宅中沈香亭禁中遠不逮虹霓屏風雕刻前代美人形服玩衣服皆衆寶雜砌水精為地外以玳瑁水犀為押絡以珍珠瑟瑟非人力所製元載芸輝堂于闐香芸潔白如玉屑以塗壁沈檀為梁棟金銀為戶牖中設前虹霓屏風紫綃帳輕疎而薄風不能透冬溫

夏凉有龍髯紫拂色如爛椹削水晶為柄刻紅玉為環
紐所幸薛瑤瑤英肌體自香處金絲帳却塵褥李昌夔在
荊州打獵大脩裝具其夫人獨孤氏亦出女騎一千皆
着紅繡襖錦鞍韉鳳靴銀鐙于頔在襄州點山燈油一
上二千石張鎡宴客牡丹會既集坐一虛堂寂無所有
俄問左右云香發未答云已發命卷簾則異香自內出
郁然滿坐羣伎以酒殽絲竹次第而至別有名伎數十
首戴牡丹衣領皆繡如其色歌昔人所作牡丹詞進酌

而退前後花與伎凡十易杯器皆如其色酒竟歌者舞者數百人列行送客燭光香霧歌吹雜作恍然若僊遊自古恩賞之重未有過於董賢楊素者賢以色素以功賢自得幸旬日間拜侍中賞賜累巨萬封侯遂進大司馬拜女弟為昭儀位次皇后妻得通籍殿中止賢廬賞賜各千萬數父恭自少府拜衛尉賜爵關內侯妻父為將作大匠弟寬信為執金吾詔將作起第北闕下重殿洞門木土之工窮極伎巧柱檻衣以絺錦武庫禁兵尚

方珍寶選物上第盡在董氏而乘輿所服乃其副也及至東園秘器珠襦玉押皆豫以賜賢無不備具又令將作為賢起塋冢義陵旁內為便房剛栢題湊外為徼道周亘數里門闕罽毼甚盛楊素初破齊賜奴婢粟帛雜畜拜信州賜錢百萬錦千段馬二百匹破陳賜物萬段粟萬石加以金寶又賜陳主妹及女伎十四人破吳寇賜綵物三千段江南定賜黃金四十斤銀餅一實以金錢縑三千段馬二百匹羊二千口公田百頃宅一區仁

壽宮成賜錢百萬緡絹三千段討突厥賜物二千段黃金百斤突厥破賜練二萬疋萬釘寶帶遷左僕射賜良馬百匹北馬二百匹奴婢百口山陵成賜物萬段田三十頃米萬石金鉢一實以金銀鉢一實以珠并綾錦五百疋賜射手賜金精盤價值鉅萬破漢王諒賜物五萬段綺羅千疋諒伎妾二十人從幸東京賜甲第一區物二千段

漢文帝即位太尉勃賜黃金五千斤丞相平將軍嬰二

千斤朱虛侯章襄平侯通典客揭各千斤宣帝即位大將軍光賜黃金七千斤錢六千萬雜繒三萬疋奴婢百七十人馬二千匹甲第一區漢世賞功之重如此

按志云黃金方寸為斤又云一斤即一金也四兩為一斤又曰一斤十六兩愚謂漢書明有賜千金及賜金千斤之異則一金當為四兩而一斤為十六兩也按漢食貨志武帝時錢益多而輕物益少而貴乃制白金三品其一曰重八兩環之其文龍名白撰直三千二百以重

差小方之其文馬直五百三曰復小攬之其文龜直三百是其時號錢輕昂銀以為幣而八兩直三千八錢止直三百也今錢之極重而精者世宗朝嘉靖錢每銀一兩直錢七百尚以兩錢當漢錢一也王莽當篡漢時造錢貨有六品契刀錯刀之類不論而銀貨二品黃金一斤直錢萬銀八兩為一流朱提銀一流直錢一千五百八十他銀一流直錢一千朱提銀出犍為至精價不可憑以他銀與黃金計之金一斤當直他銀五斤金一兩

直他銀五兩也正與今不異若金四兩為斤計之則金
一兩當直他銀二十兩也漢黃金賤而白金貴必不縣
絕乃爾又以王莽傳言之羣公奏故事聘皇后黃金二
萬斤為錢二萬萬則一斤萬錢之說合矣漢賜霍光黃
金七千斤當為錢七千萬也周勃黃金五千斤錢五十
萬也然銀八兩而直錢一千則八錢止直一百也錢之
貴三倍於武帝時矣董賢家財總錢四十三萬萬筭之
在武帝時當直龍文白撰直金一千六十六萬六千兩

在居攝時為他銀三千四百四十萬餘兩居攝正係哀
帝一二年賢家錢直當以後為準後漢供南單于歲一
億九十餘萬西域七千四百八十萬然則一億為一萬
萬也又段熲征諸羌議以騎五千步萬人車三千兩三
冬二夏約費五十四億為五十四萬萬也靈帝賣官公
為錢千萬卿五百萬若以前漢錢直計之是公當出黃
金五百斤卿二百五十斤是時南單于西域皆賓服而
歲供一為黃金一萬九十斤一為黃金七千四百八十

斤而三歲征羌之費直黃金五十四萬斤矣萬萬無此
理按桓帝時貨輕而財薄欲改鑄大錢以劉陶言而止
然則是時錢不能西漢十之一也以後鵝眼縋環之類
而錢日賤斗米一萬則又千百而一也或輕或重莫可
準則約畧言之孝武元狩五年至平帝元始中凡一百
十五年成錢二百八十萬萬而宋神宗熙寧八年每年
鑄銅鐵錢五百四十九萬九千二百三十四貫凡貫緡
皆百錢當為五萬四千萬九百二十三萬四千文不四

十歲而鑄漢百十五年錢若以千錢為貫緡又當十倍
蓋漢錢精而貴其價六倍於今之上錢唐宋錢薄小而
賤什不能當今上錢一也至於黃金則漢甚多而易得
今極少然其價貴僅十分踰二耳不甚懸也每見漢黃
金以為富於後世數十倍見唐宋錢緡以為富於漢數
十倍要而言之漢實富也

郭子儀傳云每歲月俸母慮二十四萬緡一緡為百錢
則當二十四百萬錢也若一緡為千錢則十倍之矣又

每入朝上命魚朝恩元載迭為主一宴至費錢十萬緡
按唐自開元二十四年六月總定一品月俸料八十食
料千八百雜用千二百防閣十五通計二十四千二
百然則一歲俸入錢當為二十九萬四百僅二千九百
緡餘耳汾陽縱所兼十餘職皆極品安能百倍其數耶
且一宴之費為十萬緡亦當為萬餘金矣當是時天下
方遭亂戶口歲入有限必不能爾抑史夸言之也

沈存中筆談考樂律改鑄渾儀求秦漢以前量度升斗

計六斗當今一斗七升九合秤三斤當今十三兩一斤
當今四兩三錢三分始悟所謂黃金方寸為一斤金一
斤直錢一萬或二萬價相等也飲酒一石實可三斗而
所謂蓋祿萬鍾解十萬而受萬與奉黃金萬鎰賜金千
斤者皆可類推矣

考功記金有六齊六分其金而錫居一謂之鍾鼎之齊
五分其金而錫居一謂之斧斤之齊四分其金而錫居
一謂之大刃之齊五分其金而錫居一謂之剡殺之齊

金錫半謂之鑒燧之齊按上金中金下金皆可和齊獨錫性柔而體易化不能相入豈記所謂錫者非今錫耶王楙又考周禮廩人月三鬴注六斗四升曰鬴計食米日六升四合也魏李悝曰人食米月一石半是食米日五升也漢趙充國曰以一馬自佗負三十日食為米二斛四斗麥八斛是人日米八升馬日麥二斗七升也古奴傳一人三百日食用糲十八斛是人日糲六升也古斛小漢二斗七升當今五升四合所謂人食米八升當

今二升一合六分食米六升當今一升六合觀一馬能
負米麥至此可以徵其升斗之小而倉公傳所載人大
小腸受水米之數不至可駭矣第沈存中言六斗為一
斗七升九合而楸則六斗當為一斗六升更少升九合
似當以存中為據

劉威碩在蜀車服侈靡艷妄數十能為聲樂悉教誦靈
光殿賦謝靈運門故恒數百人室宇華曠盡山泉之美
車服鮮麗衣裳器物多改舊形世共宗之徐湛之產業

甚厚宇舍園池貴游莫及伎樂之美冠絕一時門生千
餘皆三吳富人子姿質端美衣服鮮麗每出入行游塗
巷盈滿徐君倩為湘東王諮議文冠一府新聲艷語人
多諷習尤長部書問無不對善絃歌好聲色侍妾數十
皆佩金翠曳羅綺服翫悉以金銀閉門盡日酣飲有時
載伎肆意游行荆楚山川靡不游踐是四君者比之王
石尚為黔婁第文士酸寒得此亦是生天之福

先秦以前美人則有少昊之皇娥赤帝女之瓊樹桀之

妹喜紂之妲己有莘氏周穆王之盛淑人昭王之延娟

延娛幽王之褒姒楚王之息媯晉獻公之驪姬秦穆公

之女弄玉惠文之華陽夫人莊襄王之邯鄲姬吳王之

西施

即夷光

鄭旦

即脩明

楚王之鄭袖南威陽文李園妹梁

惠王之間姬趙武靈王之吳姚燕昭王之旋娟提謨中

山侯之陰后江姬皆在宮掖者也有仍氏青琴毛嬙孔

父妻徐吾犯妹夏徵舒母邾婁顏夫人皆在下者也漢

宮掖則戚夫人

高祖

慎夫人

文帝

陳后阿嬌衛后子夫邢夫

人尹夫人李夫人王夫人鈞弋夫人麗娟武帝王昭君元帝

趙后飛燕趙婕妤合德成帝陰后麗華光武甄后郭后薛靈

芸即夜來莫瓊樹陳尚衣陳巧笑皆魏文帝趙夫人潘夫人吳主

權鄧夫人吳主和朝姝麗居洛珍潔華吳主亮二喬孫策周瑜兩

楊后胡嬪芳晉武帝殷淑儀宋孝武潘妃玉兒東晉侯馮小憐北齊

後主張麗華孔貴嬪陳後主陳宣華蔡容華隋文帝朱貴兒侯

夫人袁寶兒吳絳仙俱隋煬帝武惠妃楊太真唐玄宗王才人

武宗兩周后李後主兩劉妃宋徽宗閨閣則秦羅敷顧夫人張玄妹

江無畏

臨川王宏妾

曹洪女

荀奉倩婦

李勢女

桓溫妾

樂昌公主

徐德

言無雙

王仙客婦

失行則卓文君鶯鶯非烟號國夫人狄夫

人達奚盈盈姬侍則馮方女

袁絳樹魏

翔風綠珠宋緯

石張靜琬孫荆玉

羊侃

徐月華脩容豔姿

元雍

雪兒

李密

阿劉

羊鑒紅拂

李靖紅綃崔生

薛瑤英

元載

寵姐

寧王憲

紫雲

李聽

女寶

李愿

解愁

潘炕

名伎則霍小玉李娃楚娘夜來杜韋娘史鳳楚

蓮香劉採春皆灼灼有名者若退之之桃柳樂天之蠻

素雖見詞章酸士所獲寧堪上駟哉

晉人重容觀以故負美貌能清言即雍容至顯位然所
推重無如衛洗馬叔寶如所云少時乘羊車入市觀者
傾洛城曰誰家玉人後渡江至建康年二十七矣尚為
人看殺其次則杜弘治右軍目之曰膚若凝脂眼如點
漆此神僊中人也人以比叔寶則曰那得比其中尚容
數人又曰衛玠神清杜乂膚清一時品藻若此至於何
晏裴楷王衍潘岳王濛之徒皆以美貌聞豈一時好尚
之至造物亦遂移嚮耶

向魑彌子瑕安陵龍陽鄧通董賢林仁遇以色進外張
昌宗張易之以色進內俱至卿相貴富者也

太康以後人頗外色至多怨女五行占以為災漢哀幾
於禪位苻主竟成敵國李龍為之殺妻僧達遂將阮姪
又有楚國王仲先聞潘章之美因願為友遂同衾枕篤
於伉儷未幾偕沒其家憫之塋於羅浮山忽生一樹柯
條枝葉無不相抱時人號曰共枕樹更為異矣

晉獻公欲伐郭而憚舟之僞存荀息曰周書有言美女

破舌乃遺之女樂以亂其政舟之僑諫而不聽遂去因
而伐郭遂破之又欲伐虞而憚宮之奇存荀息曰周書
有言美男破老乃遺之美男敎之惡宮之奇宮之奇以
諫而不聽遂亡因而伐虞遂取之然則虞虢之君一好
內一好外也

弇州四部稿卷一百六十六